



**Quæstionum Canonicarum, In Quinque Libros
Decretalium, Tomus ...**

In Librum I. Decretalium, Per quadraginta, & tres Titulos distributum, in
quo agitur De Constitutionibus, Seu Legibus universim ...

Krimer, Ferdinand

Augustæ Vindelicorum, 1706

§. IV. Resolvuntur argumenta contraria.

[urn:nbn:de:hbz:466:1-73031](#)

quisiverunt? multa matrimonia erunt putatitia, multæ Sacramentorum administrationes invalidæ, contractus quoque naturaliter obligantes adveniente legis notitiâ declarabuntur nulli; quæ omnia manifestam nata sunt in rem publicam inducere confusionem; ita Suarez *l. 5. de legib. c. 33. n. 8.* Laym. *l. 1. tr. 2. c. 1. & 2. Sotus l. 1. de iust. q. 1. 4. 4.* Et ideo P. Henricus Herdinck. *in M. S. d. 1. de leg. Q. 7.* hanc negativam publicè Viennæ Austriae docuit, esse probabilem, affirmativam verò probabiliorē ex auctoritate, & gravitate Doctorum eam tenentium.

138. Beccanus *in 2. 2. tr. 3. c. 6. q. 6. n. 6.* secutus præcitatam opinionem negantium, infert eum, qui habitat in aliqua Provincia, ubi ejusmodi leges Pontificiæ non sunt promulgatae, liberum esse in conscientia, licet eas non servet. Azor *l. 5. inst. moral. c. 3. q. 3.* docet, opinionem negantium esse magis consentaneam juri scripto, affirmantium, consuetudini, & mori jam recepto. sed hic mos est tantum pro foro externo; imò, ut notat Reginaldus *l. 13. n. 156.* non satis constat juri scripto, cui conformis est sententia negantium, derogatum esse universaliter contrariā consuetudine; hinc eam etiam ipse probabilem censet.

139. Ex his opinionibus oppositis probabilius videtur, quæ affirmat sufficere unam promulgationem solennem Romæ consueto more factam, non utcunque, sed completam, seu sumptam cum latitudine temporis requisita, ut moraliter diffundi possit, hoc est in notitiā deduci communitatū, quæ per ejusmodi legem, vel constitutionem Ecclesiasticam ligandæ sunt; non autem aliter; quod intellige saltem de promulgatione illarum legum, in quantum præcipiunt, vel prohibent sub culpa, in libera earum transgressione. Nam de legibus irritantibus, & similibus dicimus infra à *n. 152.* Inter has etiam & leges præcisè præcipientes, vel prohibentes discriminē est; illæ enim etiam obligant ignorantes, ut dicitur communiter, quia non attendunt præcisè, & per se obligationem ad culpam in transgredientibus, sed solum actū nullitatem, quam, ubi deinde cognoscunt, tenentur in conscientia eo actū non uti, aut quæ per illum acquisiverunt, non retinere: lex ve-

rò prohibens, aut imperans ligat subditum, ut non possit sine culpa facere, aut omittere talem actum, & quamdiu ignorat invincibiliter, neq; peccat, neq; obligatur. Quare Suarez ait *lib. 3. de legib. c. 18. n. 11.* obligare quidem tunc legem in actu primo, nondum tamen in actu secundo.

140. Ratio autem nostræ responsionis est; quia nec ex natura rei, nec jure positivo major publicatio legis requiritur, ut lex, in quantum obligat ad culpam, vim istam obligandi exercere possit in subditos, ut constat à *n. 119.* ac dicemus in resolutione contrariorum. Et ratio ulterior est; quia tota vis, & quasi causa formalis in hac re morali, quā contrahitur obligatio, relatè ad superiorēm, habetur ab actū imperij ita subditis solenniter intimati, ut hac intimatione solenniter factā, in eorum notitiā devenire possit, seclusā culpabili negligentiā ad sciendum, quid superior ab illis exigat; sed hoc habetur, licet ea solennis publicatio Romæ, vel in alio loco facta sit, modò sumatur in illa temporis latitudine, de qua suprà *n. 129.* his enim positis. cavetur malis omnibus, quæ autores contrarij prudenter metuunt, si publicatio solennis non fieret in singulis provincijs, vel diocesibus; ergo. Et pro hoc plurimum facit frequentissima jaui praxis Ecclesiæ, obligantis omnes Christi fidèles ad observantiam novarum constitutionum, licet extra Romani solemniter non publicentur, quod certè Summi Pontifices, qui efficaciter obligare volunt, nullatenus facerent, si vel ex natura rei, vel jure canonico alia solennis publicatio necessaria foret, id, quod mihi magno est arguento pro hac sententia; esto oppositam omnino judicem valde probabilem, præfertim quoad leges irritantes, inhabilitantes, & similes, quæ propter obligationem ad culpam inducunt alios etiam effectus, ut aliquid annotavimus *n. 139.*

Q. IV.

Resolvuntur argumenta contraria.

141. **I**nduplici classe sunt rationes in contrarium; aliquæ enim militant contra sententiam, quæ tanquam probabilius affirmat, sufficere unicam promulgationem solenniter factam in aliquo loco, Romæ v. g. cum illa temporis latitudine, quam ex-

posuimus; aliae, quæ negant probabilitatem opinioni contrariæ, ut insinuavimus n. 134. Ad primam ergo rationem pro prima classe, relatam n. 137. Resp. concedi, quod sacri canones, & Summi etiam Pontifices, in causis Ecclesiasticis decidendis omnino acceptent leges civiles Principum, rationabiles, & justas; quando jure canonico nihil constitutum est, quo tales causæ decidi possent; cum, ubi lex canonica deficit, nulla videatur magis idonea, quam civilis, & causa controversa decidi debeat secundum aliquam regulam æquitati, quam maximè attendit jus Ecclesiasticum, præ cæteris opportunam. Dico in causis decidendis; nam aliud est in modo condendi, ac ferendi leges. In hoc enim est longè alia ratio. 1. quia etiam in civilibus & ad obligandas plures etiam provincias, sufficit promulgatio legis, quantum est jure naturali, & spectatâ naturâ legis, solenniter facta in metropoli totius Regni, modò ea talis sit, de qua egimus n. 129.

142. Deinde, licet Ecclesia, etiam in hoc ipso, posset, si veller, imitari leges Principum, qui volunt eas debere publicari per singulas provincias; non tamen tenetur; immo se id non sequi, patet ex pluribus constitutionibus solùm Romæ publicatis, quas nihilominus ubi vis locorum (postquam ad absentium notitiam pervenerint) perinde obligare, legislator constituit, ac si personaliter omnibus intimare forent; necessarium quoque erat, ut non imitaretur eum modum ferendi leges, qui observatur in civilibus; quia si penderet essentia liter à promulgatione in singulis, sàpè vis obligativa sacrorum canonum in provincijs temporaliter subjectis jurisdictioni diversorum Principum, inanis, & omni effectu destituta maneret; cum frequenter contingat à Principijs secularibus in suis Provincijs promulgationem legis Pontificiæ impediti:

143. Ad alteram rationem in n. 137. quod gravissima in Rempublicâ Christianam incommoda invenientur, si lex Ecclesiastica non publicaretur solenniter per singulas dioceses. Resp. hæc omnia facile caveri, esto loquamus de una promulgatione Romæ solenniter facta, si attendatur, prout hoc à nobis afferitur, nimisrum nō utcunque accipiendò promulgationem Romæ factam,

quæ fit intra horam voce præconis, vel affixione scripturæ in uno urbis loco celebri, sed sumpta cum latitudine temporis, ut exposuimus n. 105. & 129. Si enim non obligent, nec vim suam exercant priùs, quam culibet communitati, vel singillatim promulgentur; vel solennis promulgatio in Residentia Papæ facta, morali certitudine innotescat (è quibus alterutrum omnino dicimus necessarium, & quodlibet eorum sufficiens ex n. 140.) cœlant omnia incommoda, quæ prudenter timeri possent ex earum legum ignorantia, quam Authores contrarij putant nascituram, si Romæ tantum promulgata, etiam in alijs Provincijs obligarent.

Ex hoc colliges, nos non utcunque asserere unicam Romæ publicationem solenniter factam sufficere; sic enim præcisè sumpta nondum lex, in vi proximè potentis obligare, vel reliquos effectus suos in actu secundo inducere, est completa, consequenter inepta, ut operetur, nisi compleatur publicatione sumptâ cum latitudine temporis, de qua dictum est, ut in communitatibus, pro quibus lex ejusmodi condita est, causare sui scientiam, vel culpabilem ignorantiam possit; si enim hac publicatione positâ nihilominus contra legem fiat, non legis culpa est; sed culpabiliter ignorantis. Et istam publicationem jam sàpient expositam, dicimus esse conditionem saltem sine qua non, etiam in dictis legibus irritantibus, inhabitantibus, suspendentibus &c. omnino necessariam, id quod suadet ratio desumpta ex damnis cæteroquin in Rempubli- cam redundaturis, contra naturam legis, in n. 137.

Et ideo leges revocatoriae privilegiorum, facultatum &c. non habent vim obligandi, quoisque promulgatae non sunt, non solùm in provincia, sed etiam in civitate, ac Parochia secundum Escobar, theolog. mor. Q. 2. l. 5. Began. in 1. 2. f. 3. c. 6. p. 6. n. 7. & communis doctrina est, debere intimari illi, cui auferuntur privilegium, vel potestas. Hinc addit Azor inst. mor. l. 5. c. 3. q. 6. indulgentias non finiri, donec de earum revocatione certiores facti sint, quibus fuerint Pontificum beneficio concessæ: sed his sati cavetur, si publicatio earum facta sit juxta n. 129.

Pro

144.

145.

146. Pro solutione aliotum, quæ authores contrariae opinionis in suum favorem assumunt, not. 1. quando in c. *Infirmitas*, de penit. & remission. dicitur: *lege medicos non teneri, nisi postquam eam Prelati promulgaverint*; solum probari, quod hoc requiratur, quia legislator expressè statuit pro tali lege; sicut statuit in lege irritante matrimonia clandestina, quæ, ut vim habeat, debet in qualibet Parochia publicari, ut habetur in Trident. sess. 24. de Reform. c. 1. sed à particulari lege, in eo, quod non habet ex natura rei, arguere universim ad omnem legem, non valet argumentum.

147. Not. 2. potissimas rationes contra authores, qui docent sufficere unicam Romæ solenniter factam publicationem, nec requiri, vel ex natura legis, vel ex generali voluntate legislatoris Ecclesiastici (quod in singulis provincijs solenniter publicetur) defunni ex magnis incommodis, & detrimentis, quæ redundarent in Rempublicam Christianam; huic tamen sequelæ jam cautum est per ea, quæ diximus n. 143. & constabit magis ex sequentibus.

Not. 3. legem aliquam posse considerari 1. in quantum est præcisè novi juris induciva, præcipiendo, vel prohibendo sic, ut ejus transgressio scienter & liberè facta imputetur ad culpam. 2. in quantum est merè penalis, nimirum non obligans ad culpam in conscientia, esto etiam scienter non observetur, sed præcisè ad subeundam poenam. 3. in quantum obligat sub culpa simul, & pæna, quo sensu dicitur lex mixta. 4. in quantum est merè declarativa legis naturalis, aut positivæ, divinæ, vel humanæ, 5. in quantum est revocativa alicujus facultatis, prius concessæ. 6. in quantum iritat aliquem actum naturaliter subsistente, vel inhabilitat alijs habilem, vel annullat jurisdictionem Ecclesiasticam, aut civilem &c. ut igitur in particulari de singulis agamus occasione objectionis factæ.

148. Not. 4. questionem posse fieri, an unica Romæ promulgatio in ejusmodi legibus sufficiat, non tantum ad effectum obligandi, ut exposuimus, sed etiam ad efficaciter in actu secundo inducendum effectum irritandi, inhabilitandi, annullandi, revocandi? Nam ut actus nulliter fiat, non semper requiritur culpa, vel forma-

lis transgressio legis ad culpam imputabilis, sed sufficit transgressio materialis, & inculpabilis omissione formæ, aut alterius alicujus ad valorem actus substantialiter requisiti, ut patet ex plurimis exemplis, præsertim in legibus irritantibus matrimonium cum impedimento dirimente etiam ignoranter contractum.

Not. 5. opinionem negantium (*sufficere unam Romæ factam solenniter promulgationem, ut dictæ leges in alijs, etiam extra Romam, Provincijs, habeant vim sufficienter obligativam in actu primo*) posse in duplice sensu intelligi. 1. si legi canonicae, solum Romæ solenniter promulgatae negent vim obligandi in Provincijs, posita solâ illa promulgatione, & non requisiâ latitudine temporis, ut moraliter diffundi possit taliter promulgatae legis debita, & requisita notitia; & in hoc sensu, judico horum opinionem esse omnino veram, ut diximus suprà; Secundò, si legi canonicae, solum Romæ solenniter promulgatae negent vim obligandi in Provincijs, posita illa promulgatione simul cum requisita latitudine temporis, intra quod ad earum communitates moraliter diffundi possit taliter promulgatae legis notitia debita, nimirum moraliter certa. & in hoc præsens quæstio est magis dubia; ad quam

150. Resp. 1. probabilius esse, ut lex canonica, in quantum est merè præceptiva, vel prohibitiva, habeat vim obligandi in actu primo proximo, vel potius in actu secundo, etiam in Provincijs, sufficere unicam Romæ factam promulgationem cum latitudine temporis, intra quod moraliter devenire possit in notitiam moraliter certam earum communitatuum, quæ tali lege obstringendæ sunt, de publicatione Romæ facta. Nam qui habet moralē certitudinem de voluntate sui legitimū superioris aliquid præcipientis, vel prohibentis alicui communitatii, sub qua ipse continetur, tanquam pars illius, non potest licet illi contravenire, sed obligatur præceptum implere, & prohibitum vitare, qui enim moraliter certus est, aliquid esse legitimè præceptum, vel prohibitum, est moraliter certus, oppositum tali voluntati esse moraliter illicitum; consequenter se teneri, ad ei non contraveniendum; sed licet voluntas illa legitimè

Superioris Romæ solenniter publicata, non sit solenniter, ac juridicè publicata in Provincijs, fieri tamen potest moraliter, quod intra latitudinem sufficientis temporis communitates talium provinciarum acquirant moralem certitudinem de publicatione facta Romæ, ac tenore integro talis legis, adeoque moralem certitudinem de voluntate sui legitimi Superioris; ergo. Sic Cardenas in tract. ad proposit: damnatas ab Innocentio XI. dis fert. i. n. 198. & alij.

151. Resp. 2. probabilius esse, ut lex canonica, *in quantum est declaratoria juris divini, naturalis, & positivi*, obliget etiam in provincijs, sufficere unicam Romæ factam esse promulgationem, cū temporis latitudine, ut & in illis dictis earum communitatibus morali certitudine innotescat. Quia sic etiam in illis Provincijs moraliter certum est, oppositum juri sic declarato, esse contra jus divinum, consequenter illicitum, atque adeò in praxi nullatenus exercendum; idem quoque dicendum est de lege canonica, seu Pontificia declarante aliam legem canonicam, seu Pontificiam, quæ prius quidem legitimè, nimurum Romæ solenniter publicata fuit cum debita latitudine temporis, sed ambigui sensu fuit, propter varietatem contraria opinantium. Ratio est eadem, quæ prioris. Nam eorum, quæ jam certò sciuntur, non requiritur nova promulgatio; hæc enim requiritur ad eum finem, ut mens, & voluntas legitimi Superioris perveniat ad notitiam certam omnium subditorum, quæ si jam presupponatur, ulterius necessaria non est, sicut quodvis medium, jam obtento fine.

152. Resp. 3. probabilius esse, ut lex canonica, seu Pontificia (*in quantum est irritans, inhabilitans, suspendens, annullans, revocans, puniens &c.* ut exposuimus à n. 147.) habeat vim efficaciter inducendi prædictos effectus etiam in alijs Provincijs, sufficere unicam Romæ promulgationem post latitudinem temporis moraliter requisiti, ut illis morali certitudine constare possit de talis legis publicatione Romæ facta. Nam sub his terminis sententia, propugnans sufficere unicam Romæ publicationem post dictam temporis latitudinem, sine alia juridica promulgatione in Provincijs, cavit omnia incom-

moda, de quibus loquitur sententia contraria in n. 137.

Ad illud dilemma *in cit. num. 137.* **153.** Resp. & dico, quod leges *irritantes &c.* Romæ solenniter publicatae, non obligent alias provincias ante latitudinem temporis requisiti, ut habeant, aut habere queant moralem certitudinem de talis legis promulgatione facta Romæ; dist. conseq. ergo per illam unicam promulgationem, *ante latitudinem illius requisiti temporis*, vim obligativam in alijs provincijs non acquisiverunt. C. *post* latitudinem illius temporis requisiti. N. consequentiam. ex n. 150. Ratio hujus est. Nam qui moraliter certus est, aut, si voluisse, potuisse habere certitudinem moralem de promulgata lege à legitimo Superiori conditâ, vi cuius aliquis contractus, sine tali forma celebratus, jure positivo irritus sit; seu nulliter fit, & tamen omittit talem formam, sibi nullitatem imputare debet, non defectui promulgationis sufficientis, ut legi se conformare possit; & sic de alijs; alias etiam culpabiliter ignorans jejuniū (cujus notitiam concione non temere neglectâ habuisset) culpam coniçere posset in legem, non satis notam.

Et ideo non pauci, etiam ex præcipuis Authoribus ad vim legis Pontificiae requirentes ejus promulgationem in provincijs, non tam requirunt *promulgationem juridicam*, quam *publicationem*, seu *notitiam* factæ promulgationis Romæ, *moraliter certam*. ut rectè observat Cardenas *cit. num. 134.* id, quod apertè suadet ratio, quam desumunt ab incommode alioquin nascituris ignoratâ lege, etiam in inculpabiliter ignorantis vim exercente; quod sanè locum non habet in sententia, quæ prærequitur moralem certitudinem, vel saltem culpabilem legis ignorantiam in communitate, ad hoc, ut vim inducendi effectus suos obtineat, ut dictum est. Unde quando Molina *tom. 2. de Just. d. 3. q. 5. n. 4.* apud Nicolaum Rodriguez Fermosinum, *de legibus Ecclesiasticis ad Rubric. tit. de Constat. n. 18.* de sententia docente (*sufficere unam Romæ publicationem*) sic loquitur: *opinio illa, quod Pontificiae leges statim post duos menses à publicatione Romæ facta obligent totam Ecclesiam, nec necessaria sit publicatio in singulis provincijs, aut diœcesibus.*

bus, ad effectum, quod nullus presumatur illas ignorare, profecto non est tam certa, quam certa supponitur; quia potius contraria meo iudicio est probabilior: solum negat uni, Romæ tantum, factæ promulgationi, certam sufficientiam intra bimestre per omnes Provincias inducendi, seu causandi necessariam notitiam talis legis, ut vim habeat obligandi, seu reddendi transgressionem imputabilem ad culpam ex praesumpta scientia legis.

155. Quod autem Molina judicans probabilem sententiam, quæ docet unicam Romæ solennem publicationem insufficiem, ut statim obliget post bimestre, non rejicit opinionem, quæ admittit, unam Romæ publicationem cum debita temporis latitudine sufficientem, ut obliget etiam in Provincijs: confirmatur ex ejus verbis tr. 2. d. 395. apud Patrem de Cardenas cit. n. 203. ubi sic loquitur: sanè dicendum est, mentem Pij V. fuisse, bullam à se latam, non prius contractus, alioquin ex natura rei licitos, irritos comparisone ignorantem eos celebrantium reddere, quam in unaquaque diocesi esset sufficienter promulgata: aut aliâ viâ ad omnium cognitionem potuerit pervenire; ex quo clare patet, juxta sententiam Molinæ non requiri determinatè promulgationem in omnibus provincijs *juridicam* legis; sed sufficere certam notitiam de promulgatione legis Romæ facta, præferim cùm ex ante citatis ejus verbis solum colligatur, eum, & meritò negare sufficere bimestre, ut lex Romæ publicata *ubique* obliget; quia revera ejus notitia intra bimestre moraliter diffundi non potest, non modò non per totum Christianum orbem; sed saepe nec per unam diocesim; maxin è cum Molina expresse dicat: aut aliâ viâ (quam promulgationis in Provincijs) ad omnium cognitionem poterit pervenire; ergo non unicè per promulgationem in Provincijs.

156. Ex dictis colliges 1. et si promulgatio legis etiam solennis *physicè* loquendo fieri possit intra brevissimum tempus, & coram paucis personis: revera tamen, loquendò moraliter, & ut vim suam exercere possit obligandò, vel alias effectus (v. g. nullitatis, revocationis, suspensio- nis &c.) inducendò, non fieri tempore brevissimo, & coram paucis; sed success-

fivè, toto nimirum eo tempore, quod moraliter necessarium est, ut illa promulgatio ad notitiam totius communitatis per illam obligandæ deveniat; nec aliter verè, ac propriè dici *promulgari*; nec censi debere ante hoc tempus integrè *promulgatam*. Sic Castropal. p. 1. t. 3. d. 1. p. 11. n. 6. Ratio constat ex dictis.

Coll. 2. Si legis publicatio in notitiam absentis deveniat miraculosò modò (cùm tamen humanò modò venire non potuerit) nullo modo obligare ad illius observationem, quia respectu illius non est publicata, ut constat ex n. 103. & seqq. ita Suarez l. 3. c. 17. n. 14. quod tamen videtur intelligendum de lege positiva humana. Nam si divina sit, miraculose cognita, habet intimationem autoritativam ipsius conditoris, cuius unius virtute miraculum illud, seu notitia, ultra vires naturæ, patrata est.

Coll. 3. esto quis habeat privatam notitiam legis publicatae v. g. Romæ, id ipsum ignorante Communitate per eam liganda, cuius ipse pars est, & membrum; non propterea obligari eâ lege, tali communitati non cognita; ratio sumitur ex n. 103. Nam obligatio legis non descendit in membra, nisi membra sint communitatis ea lege ligatae.

Coll. 4. quando dicimus ad legem Pontificiam, ut obliget in Provincijs, sufficere unicam promulgationem *integrā* Romæ factam juxta n. 139. debere intelligi, nisi aliter in ipsa bulla habeatur; si enim voluntate legislatoris suspendatur ad certum eventum, aut circumstantiam, eâ nondum positâ, suspensa manet vitalis legis, ut patet ex casu decreti Tridentini, quo irritantur matrimonia clandestina.

Ad alteram classem objectionum, quas facit Cardenas, ut diximus à n. 134. contra sententiam negantem sufficere unicam Romæ promulgationem, contendens eam defacto non amplius esse probabilem. Resp. hanc assertionem Patris de Cardenas, tam indefinite, ac universaliter acceptam non posse admetti, quia sententia negans sufficere unicam Romæ factam promulgationem, & requirens ejusdem legis Pontificiæ *promulgationem in Provincijs*, ad hoc, ut in illis vim suam, vel obligandi, vel revocandi, aut annullandi, exercat potest habere plures sensus

sensus veros, etiam nunc, & post decre-
tum Alexandri VII. ut patebit ex seq.
consequenter nullatenus in compositibiles
cum eo, quod stabilitum est infallibili
authoritate Ecclesiae in illo, aut aliis si-
milibus decretis, quæ retulimus n. 134.

160. Nam t. doctrina negantium, suffice-
re unicam Romæ factam promulgatio-
nem (antequam hæc integrè facta sit, jux-
ta n. 156.) defacto est verissima, ut constat
ex dictis; alias Pontifex subditum lege suâ
vellet obligatum, hoc est, vellet, ut se le-
gi Pontificiæ conformaret, cuius nec no-
titiam, nec culpabilcm ignorantiam ha-
beret; quod est certò falso, & omnino
impossibile, ex præmissis n. 86. Secun-
do doctrina negantium sufficere unicam
Rome factam promulgationem, ad obligan-
dum extra Romanum unum, vel alterum,
qui ejus notitiam habet, ignorantie illam
communitate, cuius ipse pars est, defacto
probabilis est, ut ostensum est n. 156. quia
nullo modo contradicit illi decreto Ale-
xandri VII. nec propterea docet ullam ex
illis propositionibus damnatis, quæ relatæ
sunt à n. 134.

161. Hinc omnino negatur, ex hoc, quod
certum fit, ex definitione Pontificia esse
scandalosam hanc propositionem (*duplica-*
tum stipendium potest sacerdos pro eadē
missa licet accipere, applicando petenti
partem specialissimam fructus ipsiusmet cele-
branti correspondentem, & hoc post decre-
tum Urbani VIII.) ex vi ejus decretalis,
inferri, illatione evidenti, vel certa hanc
ut certam: *ergo leges Pontificiæ, postquam*
Rome publicatae sunt, obligant quemlibet
etiam privatum in Provinciis, privatâ no-
titâ scientem eam promulgationem, esto
id ignoret communitas, cuius ipse pars est,
consequenter etiam bene negatur propo-
sitionem huic illatæ oppositam, esse evi-
denter, vel certò falsam; quod tamen es-
se deberet, ut Cardenas rectè concluderet.

162. Hujus ratio est 1. quia, cùm ea propo-
sitio *octava* (& sic de alijs) solum damne-
tur, ut jacet, & consequenter; in quantum
est concepta sub illis terminis *complexis*,
ut notavimus alibi; ex eo, quod fit certò
scandalosa, atque adeò, ut ponit Carde-
nas, fit certò falso, ipsam (prout jacet)
sequi, esse probabiliter tutum in praxi: so-
lum sequitur, eam opinionem non posse

jam amplius esse probabilem, quæ cum il-
la, in quantum complexè sumitur, est vel
evidenter, vel certò incompatibilis; non
autem fecus. Nam quod solum probabili-
ter, & non cum certitudine etiam morali
opponitur propositioni evidenter, vel cer-
tò veræ, non evidenter, & certò falso
est, sed solum probabiliter & cum incerti-
tudine etiam morali. Unde licet quis
supponat certò veram hanc copulativam
Petrus, & Paulus currit; consequenter,
certò falsam esse quamlibet simplicem,
dicentem: *Petrus non currit, Paulus non*
currit: certum tamen est, si ponatur ea
propositio (*Petrus & Paulus currit*) certò
falsa, nullatenus inferri legitimè, &
determinatè hanc *Petrus non currit*, vel ista
determinatè, *Paulus non currit*, certò fal-
sam esse; quia copulativa affirmativa cer-
tò falsa, potest manere certò falsa, modò
una simplicium sit certò falsa, licet altera
sit vera, similiter, si propositio aliqua com-
plexa *causalis*, vel *modalis*, sit certò falsa,
potest *dictum propositionis* manere verum,
modò *causalis*, vel *modus* sit falsus; imò
licet dictum, ac etiam causalis sit vera,
modo applicatio rationis, seu causalis sit
falsa, vel quia non habet vim causandi,
vel quia illi dicto inepte applicatur. Sic,
si ponas certò falso: *Petrus currit, quia*
vestitus est in albo: potest esse verum di-
ctum, quod *Petrus currat; & causalis*,
seu ratio, quæ assumitur, quod *vestitus sit*
in albis; & tamen propositio *causalis* ma-
nere falsa, ex defectu in causalí, non ha-
bente connexionem cum dicto, vel ine-
pte applicationis ad hoc dictum.

Sit enim hæc propositio causalis: *qui* 163,
non potest recitare matutinum, & laudes,
non tenetur ad reliquias partes, quas po-
test, quia major pars trahit ad se mino-
rem. Hæc propositio juxta Patrem de Car-
denas est certò falsa; & tamen inde non
sequitur, quod vi ejus determinatè hæc
simplex (*major pars trahit ad se minorem*)
fit certò falsa, cum alteri materiae applica-
ta, rectè concludat, ut dicimus à n. 174.
sed solum, quod vel materiae, seu *dictum*
illius propositionis causalis, vel hæc ipsa,
vel ejus applicatio ad hoc determinatum
dictum, fit certò falsa; ergo, si dicit cer-
tò falso, qui asserit: *pro eadem Missa*
etiam post decretum Urbani VIII. licet ac-
cipere duplex stipendium, quia illud de-
cretum

cretum non est publicatum in provincijs, non recte infertur illatione evidenti certò, ac determinatè falsam esse illam causam (quia non est publicatum in provincijs) sed, vel dictum vel dicti causam, vel hujus applicationem ad hoc dictum, ut ostensum est.

164. Deinde supponamus cum eodem Auctore, illam propositionem esse certò falsam ex damnatione Pontificia, quā illam pronuntiavit tanquam scandalosam; hoc tamen supposito, ut dicta propositio maneat certò falsa, non requiritur, ut omnes ejus partes sint certò falsæ, sed sufficit, quod sit certò falsum, vel illius propositionis complexa dictum, vel ratio dicti, vel hujus ad illud applicatio; sed hic non concluditur determinatè, certam illius falsitatem unicè ac determinatè fundati in ea causali, quia decretum Urbani VIII. non est publicatum in provincijs

165. Majoris prima pars videtur omnino certa; nam ut sit certò falso, dari aliquod totum, v. g. hominem; non requiritur, quod sit certò falso, dari aliquam ejus partem v. g. animam; cum sufficiat esse certum, deficere unam ejus partem essentiali, vel hanc, vel illam; ergo, ut sit certò falso, quod liceat (consequenter, quod nec post decretum Urbani VIII. sit prohibitum) accipere duplex stipendium pro una Missa, uni applicando partem specialissimam fructus, celebranti correspondentis; non requiritur necessariò, quod unicè, vel determinatè falsa sit hæc causalis, quia decretum Urbani VIII. non est publicatum in provincijs.

166. Probatur hæc consequentia. Nam, si certò esset falso, nullam dari rationem, seu fundamentum intrinsecum, ex quo si eret illicitum in dicto casu, etiam post decretum Urbani VIII. accipere duplex stipendium, illa propositio ex sui damnatione retineret suam falsitatem, esto verum maneret, decretum Pontificum non obligat in Provincijs, si non est publicatum in illis; ergo tam ex eo, quod esset falso nullum dari fundamentum intrinsecum, quo illud duplex stipendiū sit illicitum; quam quod lex Pontificia non publicata in provincijs non obliget in illis, potuit profici sci illud decretum condemnatorum dictæ opinionis, ac esse falso; at probabilius est, profectum esse ex primo capite.

Tom. I.

Nam, ut rectè P. Illsung in *Arbore Scientia boni, & mali*, seu Theol. pract. tr. 6 d. 5. n. 168. & sequitur. 2. Congregatio Cardinalium, auctoritate Urbani VIII. edidit decretum (contra quorumdam Doctorum, spectatis rationibus naturalibus, probabilem sententiam) quo declaravit, Beneficiatos non posse accipere aliud stipendium pro ijs sacrificijs, quæ ratione beneficij ab ijs exiguntur solo numero, loco, aut tempore in fundatione expresso, nisi dantem moneant de incertitudine; cum incertum sit, an non debeatur applicatio fructus ejus sacrificij juxta intentionem Fundatoris. Ex hoc enim illa propositio absoluta (quod liceat pro una missa duplex stipendium accipere) sine ulteriori modificatione prolata, omnino evadit falsa. Nam accipere stipendium certum, ex pacto applicandi fructum, de quo promittens incertus est, quod possit, iniquum est, & contra justitiam.

Neque danti stipendium securitatem præstat sacerdos in similibus casibus sacrificij alijs debiti, accipiens pro eodem aliud stipendium, offerendō illi pro hoc stipendio fructum suum specialissimum ipsimet celebranti respondentem. Nam hujus communicabilitas est vehementer incerta (cum non egreditur subjectum celebrantis) & apud authores est admodum controversa, ut constat Theologis; his prænotatis:

168. Infert Pater Illsung loc. cit. in fine, sic loquens: *Unde quo minus altero monito, & consentiente, stipendium acceptari possit, prohibitum est ab Urbano VIII. Anno 1625.* & deinde ab Alexandro VII. renovata prohibitio in dicta propositione octava (de qua n. 134.) damnata tanquam scandalosa. Ex hoc autem colligitur, rationem prohibendi, Urbano fuisse, injuriam, quam continet talis contractus, incertū pro certo dandi absque monitione, & consensu dantis certum; & Alexandro VII. damnandi eam doctrinam, quam quidam defendebant tanquam non illicitam, existimantes, cessare injuriam (consequenter fundamentum prohibitionis Pontificiae ab Urbano VIII. factæ) si sacerdos fructum specialissimum alteri, secundum stipendium offerenti, applicaret; ex quo ad summum sequitur, ex vi decreti dictam propositionem dominantis, fal-

F

sum

*Si*um esse, licitum esse illum contractum ex eo capite, quod eo casu cesseret *injuria*, in ejusmodi contractu contenta; non autem ex eo, quod decretum Urbani non sit publicatum in Provincijs. In eandem responsionem cadit, quod adducit Cardenas loco cit. ex propositione inter damnatas numero decima, cuius tenorem dedimus n. 134. Nam ratio, propter quam Urban. VIII. prohibuit propositionem dicentem: *licere sacerdoti, cui Missa celebranda traduntur, satisfacere per alium, collato illi minore stipendio, alia parte stipendijs sibi reservata*, fuit occasio satis communis periculi, seu via laxandi *cupiditatem turpis lucri*, quam (est) jure naturali illicitam multi excusabant. Et ideo, quia per hoc, quod quidam nec curantes prohibitionem, infistebant illi doctrinæ, negantes, illud prohibitonis fundamentum in dato casu, etiam post prohibitionem Urbani VIII. habere locum: in merito Alexander VII. hanc propositionem condemnavit, ut scandalosam, non ideo, quod decretum Urbani VIII. vim non haberet, ex eo, quod non sit promulgatum in provincijs; sed ex eo, quod falsum sit, tali casu non deficere periculum cupiditatis immersæ turpi lucro, quo titulo jure naturali eorum authorum doctrina falsa est.

169. Et ideo, etiam stante toto illo decreto Alexandri VII. in quo damnatur dicta propositio non potest aliquis Beneficiatus habens sufficiens stipendum, etiam in summo pro suscepta obligatione celebrandi certis diebus, si non sit personaliter obligatus celebrare, licet id peragere per ali um dando illi stipendum *justum licet non summum*, sed medium, v. g. intra latitudinem justi stipendijs, retenta sibi reliqua parte, quæ illi ex tota massa fructuum beneficialium respondet; quia in dato casu deficit *periculum cupiditatis* exinde querendi turpe lucrum; nec lreditur *jus substituti* (quia ponitur ei dari *justum pretium*) nec *substituentis*; quia totum *jus* transtulit in eum, qui onus, sub quo datum est stipendum, per substitutum (ut suppono) fideliter exequitur. Sic P. Illsung loc. cit. tr. 6. D. 5. n. 169. qui doctrinam hanc typō dedit, post decretum illud Alexandri VII. cum legitima superiorum approbatione.

170. Quod vero affert ex propositione, in eo-

dem decreto inter damnatas duodecima, quæ sic habet (*mendicantes possunt absolvere a casibus Episcopo reservatis non obtenta ad id Episcoporum facultate*) non facit certò falsam hanc doctrinam: *Leyes Pontificiae non obligant in Provinciis, in quibus publicata non sunt*. Nam ea propositio potest esse certò falsa, licet ista sit vera, ut si simpliciter, & sine addito restrin gente in mendicantibus afferatur ea facultas non sublata, utcumque per decretum Pauli V. & Urbani VIII. (a quibus dicitur emanasse decretum inhibens mendicantibus eam facultatem) *quia in provinciis promulgatum non est*, sed ex eo, quod decreta eorum Pontificum non exponantur bene v. g. dicendò, *procedere solum, ubi non adegit verum privilegium, sed tantum ejus pretextus, vel, quod agant de privilegijs solum eatenus, in quantum sunt contraria Tridentino, volentes, sua non esse talia &c.* sed de hoc satis.

171. Illud hic notandum, potissimum hujus authoris intentionem per haec tenus allata ipsius argumenta, eò tendere, ut ostendat, antiquatam, & non amplius probabilem esse illorum opinionem, qui docuerunt, *legem Pontificiam non obligare in provinciis, nisi post juridicam ejus promulgationem in illis, vel diocesibus*; factam nimirum *authoritativer*, hoc est, per eos, qui *jurisdictione* pollent ad publicationes leges Ecclesiasticas suis subditis more consueto, publicatione factâ per cathedras, vel affixionem ad valvas Ecclesiarum &c. Nos id non requiri, sed sufficere unam Romæ publicationem, sed *factam integrè* juxta n. 156. diximus esse probabilius; quamvis negemus à P. Cardenas, vi argumentorum, quæ ab illo haec tenus allata sunt, legitimè probari, quod intendit.

172. Ex dictis coll. i. verum esse, quod damnatio facta ab Alexandre dicat: *Post decretum Urbani scandalosum est dicere, quod licet ei sacerdoti dare alteri stipendum dimidiatum in casu num. 167.* Secundò etiam, quod vi huius decreti falsum sit dicere: *post decretum Urbani licet sacerdoti accipere integrum stipendum, & dare alteri dimidiatum, etiamsi pro causa fuerit assumptum*; quia decretum Urbani non est in provinciis juridicè promulgatum, negari tamen ex hoc sequi determinatè: *ergo falsum est, quod decretum Urbani non obligat*,

obliget, ubi non est juridicè promulgatum; sed solum: ergo falsum est, licere illam divisionem stipendiij, etiam post decretum Urbani, quia per hoc, quod non sit publicatum alibi, non cessat ratio, propter quam ex natura rei illicita est ea divisio, nimirum occasio cupiditatis turpis lucri; cùm ergo hæc ratio stet, etiam post decretum Urbani licet alibi non publicatum, recte falsum dicitur, licere illam stipendiij divisionem, etiam post decretum Urbani.

173. Hinc resp. in forma ad illius argumentum in n. 135. & quidem i. cum dist. majoris: opinio, licet antè probabilis, non manet probabilis, post quam evidenter, & certo fit incompatibilis cum principio certo, conc. si solum probabiliter, & etiam cum incertitudine morali fiat incompatibilis cum principio certo, neg. maj. ex n. 162. Hinc transmissa minore quoad incompatibilitatem solum probabilem, ac incertam; nego eandem quoad incompatibilitatem evidentem, & certam; consequenter etiam nego consequentiam. Ad probationem minoris resp. simpliciter negando, quod in dictis decretis Alexandri VII. (de quibus n. 134.) contineatur hoc principium certum, *leges Pontificie, Romæ more solito promulgatae, obligant in provinciis, licet in illis non sint promulgatae;* simpliciter etiam nego, hanc propositionem priori contrariam (*leges Pontificie non obligant in provinciis, si in illis promulgatae non sint*) ibi damnatam esse, ut scandalosa, consequenter, *ut certo falso.*

174. Nam in hac propositione causalii, damnata tanquam scandalosa: qui non potest matutinum & laudes, non tenetur ad minorem, quam potest, *quia major pars trahit ad se minorem,* continetur hæc; *major pars trahit ad se minorem.* Quæro jam, estne hæc propositio *major pars trahit ad se minorem,* damnata ut scandalosa, & quidem indefinite, seu universaliter, ex eo, quod illa propositione causalii, & priorem continens, ut scandalosa damnata sit: vix credam, id affirmari ab ullo, cùm in electionibns, & alijs, quæ geruntur à Communitatibus, capitulariter, vel collegialiter etiam defacto recte procedat; sed similis priori propositioni causalii est ista: *Sacerdos potest duploatum stipendum licite accipere pro eadem missa, unum nimirum pro parte correspondente gene-*

raliter missæ; alterum pro parte correspondente specialiter celebranti, *etiam post decretum Urbani VIII.* seu ut explicat Cardenas, non obstante decreto Urbani VIII. prohibente talem acceptationem, *quia decretum non publicatum in provinciis illis non obligat;* ergo licet hæc (*decretum Pontificum non publicatum in Provinciis, in illis non obligat*) concederetur inclusa in illa damnata tanquam scandalosa, non propterea ista contenta damnata esset ut scandalosa; cuius ratio est ex n. 163.

175. Resp. 2. ad idem argumentum in n. 135. transmissa majore, nego min. ad hujus probationem neg. ma. Nam ex certa falsitate propositionis affirmativæ complexxæ, & causalii, malè concluditur: ergo hæc determinatè pars complexi, est determinatè falsa; & contradictionum illius, certò verum, ut constat ex n. 163. alias ex hoc, quod certò falsum sit, *in hoc cubiculo datur fornax, quia est viridis,* inferre liceret, ut falsum determinatè: ergo *fornax non est viridis,* quia est contenta in propositione complexa certò falsa. Damnatur igitur sententia dicens licite accipi duplex illud stipendum, etiam post decretum Urbani, tanquam scandalosa; quia etiam, si tale decretum non sit publicatum in provincijs, per hoc non deficit ratio illiciti, quæ est cupiditas turpis lucri, & venditio specialissimi fructus ex missa respondentis celebranti; quæ est manifestè simoniaca; non igitur evidens, aut certum est, propositionem negantem, solam publicationem Romæ factam sufficere, ut ubique obliget, esse incompossibilem cum principio certo, post decretum Alexandri VII. ut contendit Cardenas in n. 135.

§. V.

An leges Pontificie promulgatae, primum obligent post bimestre, lapsum à die promulgationis factæ?

176. Supponendum, stando in natura legis Sex dictis colligi posse, quando legestam canonice, quam civiles obligent; hæc enim est, quod lex, postquam debitè publicata est, suppositis cæteris ad legis naturam essentialiter requisitis, statim obliget, nisi legislator apponat terminum à die promulgationis factæ computandum,